



Կարգապահական գործ թիվ ԿԳ-15159

Հայաստանի Հանրապետության փաստաբանների պալատի խորհրդի
2015 թվականի դեկտեմբերի 11-ի թիվ 339-րդ նիստի

Ո Ր Ո Շ ՈՒ Մ ԹԻՎ ԿԳ/205-Ա
ՓԱՍՏԱԲԱՆ ԶՈՒԼԻԵՏԱ ՄԿՐՏՉՅԱՆԻՆ ԿԱՐԳԱՊԱՀԱԿԱՆ
ՊԱՏԱՍԽԱՆԱՏՎՈՒԹՅԱՆ ԵՆԹԱՐԿԵԼՈՒ ՀԱՐՑԸ ՔՆՆԵԼՈՒ ՄԱՍԻՆ
(ՎԵՐԱՊԱՏՐԱՍՏՄԱՆ ԴԱՍԸՆԹԱՑՆԵՐԻ ԳՈՐԾՈՎ)

Հայաստանի Հանրապետության փաստաբանների պալատի (**այսուհետ նաև՝ Պալատ**) խորհուրդը (**այսուհետ նաև՝ խորհուրդ**), նիստը նախագահող՝ Կարեն Մեժլումյանի, **խորհրդի անդամներ՝** Մելանյա Առուստամյանի, Սիմոն Բաբայանի, Նելլի Հարությունյանի, Հարություն Հարությունյանի, Մարտուն Փանոսյանի, Կարեն Սարգսյանի, Լիպարիտ Սիմոնյանի, Լուսինե Սահակյանի և Տիգրան Խուրշուդյանի կազմով,

քարտուղարությամբ Նոննա Համբարձումյանի,

քննության առնելով փաստաբան Զուլիետա Մկրտչյանին (արտոնագիր թիվ 73) կարգապահական պատասխանատվության ենթարկելու վերաբերյալ հարցը

Պ Ա Ր Զ Ե Ց՝

1. Կարգապահական վարույթ հարուցելու առիթը և հիմքը.

«Հայաստանի Հանրապետության փաստաբանական դպրոց» հիմնադրամի (այսուհետ՝ Դպրոց) կողմից 16.07.2015թ. ներկայացված տեղեկանքի համաձայն՝ փաստաբան **Զուլիետա Մկրտչյանը** (արտոնագիր թիվ 73) 2015թ. հունվար-հունիս (ներառյալ) չի մասնակցել պարտադիր վերապատրաստման դասընթացներին և չի լրացրել պարտադիր վերապատրաստման որևէ ժամ:

2. Կարգապահական վարույթ հարուցելու մասին որոշումը.

ՀՀ փաստաբանների պալատի նախագահի տեղակալի 24.07.2015թ. թիվ 285-Ա/ԿԳ-15159 որոշմամբ կարգապահական վարույթ է հարուցվել փաստաբան Զուլիետա Մկրտչյանի նկատմամբ՝ «Փաստաբանության մասին» ՀՀ օրենքի 19-րդ հոդվածի 1-ին մասի 4.1 ենթակետի և Պալատի ընդհանուր ժողովի կողմից 11.02.2012թ. թիվ 1/4-Լ որոշմամբ հաստատված Փաստաբանի վարքագծի կանոնագրքի (**այսուհետ՝ Կանոնագիրք**) 2.8.2 կետի խախտման հատկանիշներով:

3. Պատասխանողի համառոտ բացատրությունը.

Փաստաբան Զուլիետա Մկրտչյանը 11.12.2015թ. գրավոր դիմումով պարտավորվել է հաշվետու կիսամյակում չանցած վերապատրաստման դասընթացների ժամերն իր հաշվին անցնել հաջորդ կիսամյակում և խնդրել է

կարգապահական գործի վարույթը կարճել:

4. Գործի հանգամանքները՝ առկա ապացույցների վկայակոչմամբ.

Պալատի խորհուրդը՝ ուսումնասիրելով գործում առկա գրավոր փաստաթղթերը (այդ թվում՝ Դպրոցի 16.07.2015թ. ներկայացված տեղեկանքով), հաստատված է համարում հետևյալ փաստերը.

1) 2015թ. առաջին կիսամյակի (հունվար-հունիս (ներառյալ)) ընթացքում Պալատի, Դպրոցի և Պալատի կողմից սահմանված կարգով հավաքարմագրված կազմակերպությունների կողմից կազմակերպվել են 94 (իննսունչորս) վերապատրաստման դասընթացներ:

Նշված փաստը հաստատվում է Պալատի վերապատրաստման հարցերով համակարգողի 11.12.2015թ. տեղեկանքով:

2) Փաստաբան Ջուլիետա Մկրտչյանը 2015թ. հունվար-հունիս (ներառյալ) չի մասնակցել պարտադիր վերապատրաստման դասընթացներին և չի լրացրել պարտադիր վերապատրաստման որևէ ժամ:

Նշված փաստը հաստատվում է Դպրոցի 16.07.2015թ. տեղեկանքով:

3) Փաստաբան Ջուլիետա Մկրտչյանի նկատմամբ սահմանված կարգով և ժամաքանակով վերապատրաստման դասընթացներին չմասնակցելու հիմքով կարգապահական վարույթ հարուցվել է առաջին անգամ:

Նշված փաստը հաստատվում է Պալատի ընդհանուր դեպարտամենտի ղեկավարի 11.12.2015թ. տեղեկանքով:

4) Փաստաբան Ջուլիետա Մկրտչյանը պարտավորվել է հաշվետու կիսամյակում չանցած վերապատրաստման դասընթացների ժամերն իր հաշվին անցնել հաջորդ կիսամյակում:

Նշված փաստը հաստատվում է փաստաբան Ջուլիետա Մկրտչյանի 11.12.2015թ. դիմումով:

5. Պատասխանողի անձը բնութագրող հանգամանքները.

Պալատի ընդհանուր դեպարտամենտի ղեկավարի կողմից 11.12.2015թ. տրամադրված տեղեկանքի համաձայն՝ փաստաբան Ջուլիետա Մկրտչյանի (արտոնագիր 73 ստացած 18.03.1999թ.) նկատմամբ 2006-2015թթ. ընկած ժամանակահատվածում կարգապահական վարույթներ չեն հարուցվել (չհաշված ՀՀ փաստաբանների պալատի նախագահի 24.07.2015թ. թիվ 285-Ա/ԿԳ-15159 որոշմամբ հարուցված կարգապահական գործը):

6. Պալատի խորհրդի պատճառաբանված եզրակացությունը և որոշումը.

Շիմք ընդունելով Պալատի խորհրդի կողմից հաստատված փաստերը, դրանք հիմնավորող գործում առկա ապացույցները և քննարկվող իրավահարաբերությունները կարգավորող կանոնները, Պալատի խորհուրդը գտնում է, որ փաստաբան Ջուլիետա Մկրտչյանի նկատմամբ կարգապահական գործի վարույթը ենթակա է կարճման՝ հետևյալ պատճառաբանությամբ.

Փաստաբանների վերապատրաստման հետ կապված հարաբերությունները կարգավորվում են «Փաստաբանության մասին» ՀՀ օրենքի և Պալատի խորհրդի 18.12.2014թ. թիվ 35/8-Լ որոշմամբ նոր խմբագրությամբ հաստատված «Փաստաբանների վերապատրաստման» կարգի (այսուհետ՝ **Կարգ**) դրույթներով:

«Փաստաբանության մասին» ՀՀ օրենքի 19-րդ հոդվածի 1-ին մասի 4.1 կետի համաձայն՝ **փաստաբանը պարտավոր է՝ ... 4.1) սահմանված կարգով և ժամաքանակով մասնակցել սույն օրենքով նախատեսված վերապատրաստման դասընթացներին:**

Կանոնագրքի 2.8.2 ենթակետը սահմանում է, որ **փաստաբանը պարտավոր է Պալատի խորհրդի կողմից սահմանված կարգով և ժամաքանակով մասնակցել Օրենքով նախատեսված վերապատրաստման դասընթացներին:**

Կարգի 8-րդ կետի համաձայն՝ Յուրաքանչյուր կիսամյակի (վեց ամսվա) համար փաստաբանը՝ Կարգով նախատեսված ժամկետում և ընթացակարգով, պետք է անցնի **12 (տասներկու) ակադեմիական ժամ (այսուհետ՝ ժամ, 1 (մեկ) ակադեմիական ժամը հավասար է 40 (քառասուն) րոպեի) վերապատրաստում:** Կիսամյակի հաշվարկը՝ ա) սկսվում է հունվար ամսից և ավարտվում հունիսին (ներառյալ), կամ բ) սկսվում է հուլիս ամսից և ավարտվում դեկտեմբերին (ներառյալ):

Փաստաբան Ջուլիետա Մկրտչյանի նկատմամբ սույն կարգապահական վարույթը հարուցվել է այն հիմքով, որ վերջինս՝ խախտելով Կարգի վերոնշյալ կանոնը, 2015թ. առաջին կիսամյակի (հունվարից հունիս (ներառյալ)) ընթացքում չի մասնակցել պարտադիր վերապատրաստման դասընթացներին:

Պալատի խորհուրդն արձանագրում է, որ 2015 թվականի հունվար-հունիս (ներառյալ) ամիսներին Պալատը կազմակերպել է 94 (իննսունչորս) վերապատրաստման դասընթացներ (չհաշված առցանց վերապատրաստման դասընթացները), որոնք վարել են 49 դասավանդողներ: Դասավանդողների մեջ այլ մասնագետներից բացի ներառվել են նաև 25 փաստաբաններ, 4 դատավորներ և 11 գիտնականներ: Ընդ որում, թեմաները նախապես հաստատված և տեղադրված են եղել Պալատի կայքում, ինչպես նաև յուրաքանչյուր ամսվա դասացուցակները հաստատվել և տեղադրված են եղել Պալատի կայքում:

Նման պայմաններում՝ Պալատը խորհուրդն արձանագրում է, որ փաստաբան Ջուլիետա Մկրտչյանն օբյեկտիվորեն ունեցել է հնարավորություն հաշվետու ժամանակահատվածում անցնելու տվյալ կիսամյակի համար պարտադիր 12 (տասներկու) ժամ ժամաքանակով վերապատրաստման դասընթացները, սակայն չի կատարել օրենքով նախատեսված պարտականությունը:

Պալատի խորհրդի՝ «ՀՀ փաստաբանների պալատի խորհրդի 18.12.2014թ. թիվ 35/8-Լ որոշմամբ նոր խմբագրությամբ հաստատված «Փաստաբանների վերապատրաստման» կարգում լրացումներ կատարելու հարցը քննարկելու մասին» 29.10.2015թ. թիվ 28/8-Լ որոշմամբ (այսուհետ՝ Որոշում)՝ Կարգը լրացվել է 30.¹ կետով, համաձայն որի՝ **երթե փաստաբանը գրավոր դիմում (այդ թվում՝ էլեկտրոնային փոստի միջոցով) է ներկայացնում Պալատին՝ պարտավորվելով հաշվետու կիսամյակում չանցած վերապատրաստման դասընթացների ժամերն իր հաշվին անցնել հաջորդ կիսամյակում, ապա՝ ... վերապատրաստման դասընթաց չանցնելու հիմքով փաստաբանի նկատմամբ առաջին անգամ հարուցված կարգապահական վարույթը կարճվում է:**

Որոշման 4-րդ կետով սահմանվել է, որ Որոշումը տարածվում է **2015 թվականի հունվարի 1-ից (Կարգն ուժի մեջ մտնելուց) հետո ծագած հարաբերությունների վրա (տրվում է հետադարձ ուժ):**

Պալատի ընդհանուր դեպարտամենտի ղեկավարի 11.12.2015թ. տեղեկանքից բխում է, որ փաստաբան Ջուլիետա Մկրտչյանի նկատմամբ «Փաստաբանության մասին» ՀՀ օրենքի 19-րդ հոդվածի 1-ին մասի 4.1 կետի և Կանոնագրքի 2.8.2

ենթակետի խախտման հատկանիշներով, այն է՝ վերապատրաստման դասընթացներին չմասնակցելու հիմքով, կարգապահական վարույթ հարուցվել է առաջին անգամ:

Կարգում վերոնշյալ լրացումը կատարելուց հետո, **փաստաբան Զուլիետա Մկրտչյանը 11.12.2015թ. դիմումով պարտավորվել է հաշվետու կիսամյակում չանցած վերապատրաստման դասընթացների ժամերն իր հաշվին անցնել հաջորդ կիսամյակում:**

Նման պայմաններում, Պալատի խորհուրդը՝ հիմք ընդունելով Որոշման 4-րդ կետի կարգավորումը (որոշմանը հետադարձ ուժ տալը), հաշվի առնելով նաև Զուլիետա Մկրտչյանի դիմումը՝ գտնում է, որ Կարգի 30.¹ կետով սահմանված արտոնությունը կիրառելի է նաև փաստաբան Զուլիետա Մկրտչյանի նկատմամբ, իսկ «Փաստաբանության մասին» ՀՀ օրենքի 19-րդ հոդվածի 1-ին մասի 4.1 կետի և Կանոնագրքի 2.8.2 ենթակետի խախտման հատկանիշներով հարուցված սույն կարգապահական վարույթը ենթակա է կարճման:

Միաժամանակ՝ Պալատի խորհուրդը հարկ է համարում փաստաբան Զուլիետա Մկրտչյանի ուշադրությունը հրավիրել այն հանգամանքի վրա, որ Կարգի 30.³ կետի համաձայն՝ սույն Կարգի 30.¹ կետով սահմանված արտոնությունից փաստաբանը կարող է օգտվել միայն մեկ անգամ:

Ելնելով վերոգրյալից, Պալատի խորհուրդը՝ ղեկավարվելով «Փաստաբանության մասին» ՀՀ օրենքի 39.7-րդ և 39.9-րդ հոդվածներով, Կարգի 30.¹ կետի, ինչպես նաև Որոշման պահանջներով

Ո Ր Ո Շ Ե Ց՝

1. Փաստաբան Զուլիետա Մկրտչյանի (արտոնագիր թիվ 73) նկատմամբ 24.07.2015 թվականին հարուցված թիվ 285-Ա/ԿԳ-15159 կարգապահական գործի վարույթը կարճել՝ փաստաբանի նկատմամբ Պալատի խորհրդի 18.12.2014թ. թիվ 35/8-Լ որոշմամբ նոր խմբագրությամբ հաստատված «Փաստաբանների վերապատրաստման» կարգի 30.¹ կետով սահմանված արտոնությունը կիրառելու հիմքով:

2. Հանձնարարել Պալատի աշխատակազմի ղեկավարին՝ սույն որոշման մասին իրազեկել փաստաբան Զուլիետա Մկրտչյանին:

Ծանոթություն. Սույն որոշումը կարող է բողոքարկվել դատական կարգով՝ որոշումն ստանալու օրվանից՝ մեկամսյա ժամկետում: Սույն որոշումն ուժի մեջ է մտնում բողոքարկման համար սահմանված ժամկետն անցնելուց հետո:

Հայաստանի Հանրապետության
փաստաբանների պալատի խորհրդի
կարգապահական գործով
նիստը նախագահող՝

Կարեն Մեծլումյան